

西昇經集註卷之五

續五

華陽書虛言句由孫道遠冲子

性真子李榮 劉仁會 註

君 虛 子 集

身心章第二十四

老子曰身之虛也而萬物至心之無也而和氣歸

冲曰體與道合是身之虛也心與天同是心之無也身虛而萬物自至心無而和氣自歸故虛無者無為之至妙也

故善養身者藏身於身而不出也藏人於人而不見也

冲曰藏身謂陸沉晦迹而不出其才能也藏人謂混俗同塵而不見其智德也

故君子之治必先死於國

劉曰死猶遺忘也夫遺忘其國者雖居物首不為貴也富有四海不為利也不為利侈靡皆捐不為貴則情逸斯素素情逸則力役不勞捐侈靡則財用不竭夫財用不竭則儲積充力役不勞則養生靜養生靜

則國安儲積充則國實國實者則理之基也國安者則理之本也保夫至理之基本者其由遺忘國乎如達此道敗忘立至稽諸故實詎俟斷焉

既死不亡其國盛也民不敢散更復充也

劉曰遺而有之故不亡無為而理故國盛矣及群生遂性樂俗安居甘食美服不相

往來李曰死猶忘也修身之者體即身無身即人無人忘身而身存理國之者體同

虛寂德並太空兼忘天下故云必先死於國既亡於國在宥天下薄賦輕徭兆人安

樂故云既死不亡其國盛也政化太平人不流亡故曰不散國實人富積粟足兵故

曰復充

若能知常施行反也

冲曰人能知素真常存玄德大道凡所施行與俗皆反也劉曰能知常道者凡所施為行事皆令歸反其真性也

衆人歡樂用生生也動而失之壽命竭也

韋曰死而不亡者壽之常也而行與俗殊

故曰反也衆人以生生之厚故動而失生而命盡也冲曰衆人以百年為常安身厚味為樂用聲色六欲以生生動則傷生失性致壽命竭盡也李曰衆人用有生之命持以生身放情極欲以為歡樂而有害命

傷身上既失道下亦失身故云動而失之壽命竭也

夫天下大物哉甚綿綿也冥冥混沌不可知也

徐曰夫大物者太極大道太極者天地之

父母也道之奧也綿綿常存不斷不絕冥冥幽深混沌無分別不可以智知難以

言論也

知之者去之欲之者離之近之者遠之

李曰使智求之而不得故曰去之以欲取

之而不得故曰離之不可以為親故曰遠之

是以聖人非託於天下亦非託於鬼神亦非託於萬物常以虛為身亦以無為心

李曰託謂因假也聖人所以得道者願不

因於天下幽不假於鬼神亦無賴於萬物
常以虛為身亦以無為心而自然成道人
若心忘有事志在虛無雖不欲成道而道
自成也

此兩者同謂之無身之身無心之心可謂守
神

李曰兩者虛無也以虛為身此乃無身之
身以無為心此乃無心之心無心之心則
無心無身之身則無身至無身心是謂守
神雖曰守神可以虛無故神自歸之故曰
守神劉曰係累外絕神明內安守神之道
也

守神玄通是謂道同

章曰神不離形故曰守也神形相係則通
玄而合道也李曰能以虛無守神神通虛
無之妙身同於大道之體故曰玄通也

無思章第二十五

老子曰智士無思無慮之變
章曰大智之士以百姓心為心故曰無思
無慮之變也

常空虛無為恬靜修其形體而為物有焉

李曰無智之者必貪有欲有智之士未肯
無為是以滯凡庸以能歸道聖人勸戒意
在虛空故曰有智之士多生思慮好為
變詐常須空彼我端寂無為身不躁競為

恬心無浮動為靜內外清靜是修其形體
於物無害為物所養故曰有焉

變者貪天下之珍以快其情

李曰積思慮好詭詐逐欲不止萬境遷改
為變也夫難得之貨是天下之珍懷貪無

已縱欲暢心禽色荒亂此快其情也情快
於前政敗於後必然之理的如可見故舉
下文以示之也

然後軍兵四起禍生於內

劉曰舟中之人皆為敵國

國動亂者而民勞疲也

李曰以道濟物以文柔遠百姓日用而不
知萬國自然而歡泰少私寡欲貴粟賤金
俗樂家安樂和禮洽此無為之化也若肆
情極欲奢淫好勝四郊多事五兵動作疊

起蕭牆禍生於內也君既昏亂臣不忠正

國動亂也征役不止困於轉輸人勞疲也
夫國以民為本民勞去者國立廢矣

冲曰身以神氣為本神守氣聚則長生也
若有為有事勞損神氣神去氣散則形廢

矣李曰為國之本要在安人人安則逸人
危則勞逸則人居勞則人去國之興也寔

在於人人既去焉是知國廢理亂由道興
廢在人以道愛人天長地久矣劉曰民惟
邦本本散國亡

所謂出其無極之實入賊利斧戰也

冲曰斧戰兵器也生命貴重於萬金神存
氣聚則生命無窮神亡氣散則身殞命盡

故曰出其無極之實也六賊外入三毒內
興攻伐甚於六軍殺傷利於斧戰也李曰

實者無為之道也賊者有為之兵也我無
為而人自化此用無為之道也若不用無

為之道是出其無極之實如用有為之兵
也兵能害物日費千金甚於鋒刃故云入
賊利斧戰也

是以聖人無為無事欲安其國民也

李曰不貪欲故無為不好兵故無事貪欲則人損戰伐則人勞無為無事不損不勞百姓安寧聖人之化也

故曰子能知一萬事畢
李曰無為用道知一也功成事遂事畢也
內明達於至道知一也行成德就從因證
果得於真道事畢也
無心德留而鬼神伏矣

徐曰一者真一也德常德也知一者無一
而不知故萬事畢矣虛空無心常德留止
故能官天地府萬物威振千靈鬼神畏伏
矣內解鬼者精也真一一之至極常德德
之至貴乃精神之根本道氣之元先故精
神臣伏萬氣歸宗也李曰聖人無心不起
貪欲道在於己德止於身故曰留也用道
則道流遐邇懷德則德被幽明既為人之
所歸依亦為鬼神之所伏從也劉曰有心
為德德斯去矣故經云上德不德是以有
德其鬼不神故曰伏之矣

我命章第二十六

老子曰我命在我不屬天地

李曰天地無私任物自化壽之長短豈使
之哉但由人行有善有惡故命有窮通若
能存之以道納之以氣氣積則命不絕道
在則壽自長故云不屬天地

我不視不聽不知神不出身與道同久

李曰不視不聽不為色所盲不聽不為聲
所聾不知故不為智所困絕聲色而清淨
去分別而無為神不離人故云不出於身

身將神合命與道同故云長久所言不屬
天地其行如是遂與道同劉曰耳目之用
廢心智之慮忘心神不出身契乎常道矣
吾與天地分一氣而治自守根本也

韋曰天地與我俱稟自然一氣之所生各
是一物耳焉能生我命乎我但去心知絕
耳目各守本根之一氣則與道同久矣莊
子曰天地與我並生萬物與我為一此之
謂也李曰萬物俱資於大道三才同稟於
一氣而人皆逐末遂至傷生老君守本故

能成道若能法聖人而為行虛極自然可
致也

非效衆人行善非行仁義非行忠信非行恭
敬非行愛欲萬物即利來

李曰為善必近名為惡必近刑聖人遠之
刑名故不學衆人行善仁者殺身以成人
義者殺非而正己聖人修身故不殺止邪

故無正非行仁義也忠信者道之華聖人
棄華取實不行忠信也孝非天性禮異至
誠心狠貌恭故非妙行所以不行欲為凶

禍之根愛是煩惱之源愛欲在己身尚不
安如何得道聖人清靜非行愛欲也於物
無害物利自來

常懷怕無為大道歸也

李曰上文行善及至愛欲皆是有為之事
也老君懷道抱德恬靜無為常行此行遂
得成真故云大道歸也劉曰有益者物赴
無為者道歸

故神人無光聖人無名

劉曰內明無光德隱群遊李曰大道若歸

1812

用無不可變化不測謂之神智無不通謂之聖人非有事神實無為智照幽寂故無先隱形藏用故無名矣

兵者章第二十七

老子曰夫兵者天下之大凶事也非國之寶

劉曰兵動害物後國亡家禍莫大焉豈曰國寶

寶之者而不用也

韋曰守道無為則天下各安其所安而兵不用矣此之謂大寶也安用此不祥之凶

器哉劉曰國寶者不用兵

用之者動有亡國失民之患也

李曰克定禍亂義實由兵以應用之其戰自勝然兵既主殺殺為凶事非國寶也好生惡殺重要愛人無為戰兵為國寶也故

云寶之者不用用之者動有亡國失人之患此是凶之大也劉曰若用兵必至於此也夫安天下者當以無事况用兵乎不待

以用之非樂然也

是以聖人懷微妙抱質朴而不敢有為與天

下文事焉

冲曰聖人空虛無為懷道守德不敢趨競有為與天下之人交爭名利也李曰存之要道懷微妙也無失海風抱質朴也無為去兵息於機戰伐不與天下交爭矣劉曰

有為有欲爭者奪之無事無為樂推不去雖有猛獸不能撻也雖有蜂蠆蟲蛇不能螫也雖有兵刃不能害也

李曰心存正道行移質朴恕已及物內無害心雖有外毒不能加也劉曰子雖凶頑不能害於慈父獸雖猛厲不能害於聖人

以其積德玄通故也是以天下莫能害焉

韋曰德冲六合玄通宇宙宇宙者將與萬物為一體與天地為一心然則猛獸兵刃乃是我體之塵垢耳安能傷我哉

柔弱章第二十八

老子曰天下柔弱莫過於一氣氣莫柔弱於道

劉曰氣雖柔弱聚散有時道之為物無時而積

道之所以柔弱者包裹天地貫穿萬物

韋曰天地在空玄之內夫空玄之空不能空道故包裹天地萬金石堅剛不能墮道故貫穿萬物焉劉曰若非柔弱豈能包裹貫穿哉

夫柔之生剛弱之生強而天下莫能知其根本所以從生者乎

韋曰柔弱者道與氣也剛強者天地與萬物也根本即自然之道也劉曰剛強之質從柔弱而生之物各有之不知其本所謂

性與天道不可得而聞也

是故有以無為母無以虛為母虛以道為母自然者道之根本也

李曰凡物有形必自無生故以無為母元無所有以有有故遂乃有無無本空虛起

無見者從虛而來故以虛為母虛既空矣

何能運行通而不墜必由於道故以道為母道者非無非有非實非虛不來不去不

始不終非物使之非人所造不知所以號曰自然道既自然而來自然即是道之根

本此名無能生有次第且生欲結前能行
柔弱則以生剛強也劉曰階淺以至深至
妙莫知所由故曰自然者也

民之章第二十九

老子曰民之所以輕命早終者民自令之耳

非天地毀鬼神害

章曰天地之大者生也豈無故毀人命哉
以道莅天下其鬼不神亦安得害我命哉
以其有知以其形動故也

章曰用智逐欲勞動其身形廢神竭故中

道天而不終也劉曰智生形動逐欲取敗

自貽伊戚鬼神何為

是故無有生有無形生形何况於成事而敗
之乎

徐曰人未生時本無有身雜於恍惚之間

變而有氣氣變而有形形變而有生不能
清淨無為養神守身使長生久視况復生
養失理動為罪咎敗其成身善事致喪命
早終乎劉曰心本無為情欲斯起神體無
象形色乃生無象無為尚生形欲成事取

敗詎足怪哉

人欲長久斷情去欲心意以索命為反歸之
李曰縱欲傷身斷情益壽絕有為之想內
外都盡心意以索也年非外情命在己身
故曰反歸之

形神合同固能長久

劉曰夫欲保命長久不令早終者當須除
情去欲心意都盡命自歸之更無他術索
盡也謂俱無欲也李曰鬼離於人則身死
神將形合則命長也

天下章第三十

老子曰人雖在天下今意莫在天下人雖在
國今意莫在國人雖在鄉今意莫在鄉人雖
在家今意莫在家神雖在身今神莫在身是
謂道人

章曰所在皆忘故能所在皆存劉曰涉遠
之實誰留迎旅趣真之士執頽形體形骸
尚忘况乎家國猶棄人天何為

意微章第三十一

老子曰患生不意

冲曰夫富貴之人自謂歡樂無憂不意三
字者反為我身累患也

禍生絲微

絲李劉本作私李曰患以累身禍為破滅
意不以為患而患已來私不以為禍而禍

自至人知在生實畏禍患終日戒懼仍慮

橫來况公然行惡如何可免是以君子慎
微為之於未有也冲曰絲别本作私誤也
不畏絲微之惡致生綸著之禍故曰小罪
不積則大罪不成是以經言民不畏威則

大畏至矣

善生於惡

劉曰喪命之由為貪善名

利生於害

劉曰吞鉤者為貪芳餌也

大生於小

劉曰合抱之木生於毫末

難生於易

李曰天下難事必作於易劉曰始乎履霜

至於堅冰

高生於下

李曰九重之臺起於臺上

速生於近

李曰千里之行始於足下

外生於內

李曰由內故有外也劉曰言出乎外行加乎內

貴生於賤

李曰因卑以至尊也劉曰貴以賤為本

動生於安

李曰因靜而有動也劉曰安其身而後動

盛生於衰

李曰熱極則寒劉曰日中則昃

陰生於陽

李曰陰陽猶死生也夫天下同善而無惡

同利而無害者則善之名無因而生然則

善名由有惡而生利名由有害而生凡此

上事皆是有欲有私之患也李曰靜極則

熱劉曰命呂則律

是故有無之相生虛實之相成

李曰有生於無無生於有故曰相生虛者

陰也實者陽也熱極寒實成虛也靜極躁

虛成實也故曰相成劉曰有之以為利無

之以為用

是以有歸有無歸無也

李曰有善則有惡是有歸有也無利則無

害是無歸無也劉曰本乎天者親上本乎

地者親下

西昇經集註卷之五

西昇經集註卷之六

維六

華陽子處言 句曲徐道遠 冲玄子

任真子李榮 劉仁會 註

碧 虛 子 集

在道章第三十二

老子曰人在道中道在人中

李曰道則大無不包人則非道不生故知

人在道中也道有細無不入物無不在是

知道在人中也

魚在水中水在魚中

劉曰人之神氣天地交通也方彼遊魚內

外資水

道去人死水乾魚終

李曰此舉喻也魚之於水猶人之於道道

在則人存道去則人亡水有則魚生水無

則魚死人必須歸道魚定當歸水故曰人

相造乎道魚相造乎水水之與道人之與

魚不可暫失矣

故聖人自知反歸未生捐棄憍奢絕除憂患

李曰捐棄憍奢然後絕除憂患憂患既除